



INSTITUTE FOR THE RESEARCH OF GENOCIDE
CANADA

14. februar, 2014

Saopćenje za javnost povodom političke krize i nestabilnosti u Bosni i Hercegovini

Povodom trenutne političke krize i nestabilnosti u Bosni i Hercegovini, Kongres Bošnjaka Sjeverne Amerike („KBSA“) i Institut za Istraživanje Genocida Kanada („IGK“) pozivaju građane Bosne i Hercegovine da na miran i dostojanstven način zahtijevaju sveobuhvatne političke i ekonomske reforme za cijelu Bosnu i Hercegovinu, a ne samo jedan entitet. Problemi s kojim se suočavaju svi građani Bosne i Hercegovine neovisno od etničke i vjerske pripadnosti i u svim entitetima i opštinama su posljedice osamnestogodišnjeg Dejtonskog političkog sistema koji izvorno podstiče korupciju, nepotizam, te uzrokuje društvene i ekonomske teškoće. Isti sistem je suprotan svim modernim principima kojim se politička zastupljenost zasniva na građanskim temeljima jednakosti, slobode, društvene i ekonomske bezbjednosti te pravom na zaposlenje, obrazovanje, i budućnost kao što to već imaju i drugi europski narodi, odnosno građani. Također podržavamo napore građana Bosne i Hercegovine u svim gradovima države i manjem entitetu, koji su također izrazili svoje nezadovoljstvo, da se solidarišu sa svojim sugrađanima i zahtjevaju unaprijeđenje društvenog i ekonomskog stanja u njihovim gradovima i zajednicama.

Osuđujemo sve oblike nasilja i huliganizma, posebno napadima na državne zgrade i institucije jer su oni suprotni navedenim građanskim načelima. Također kategorički osuđujemo sve oblike politizacije ovog pitanja od strane vladajućih i opozicionih stranaka. Sve nemile događaje i napade na zgrade države Bosne i Hercegovine i njezinih institucija trebamo shvatiti kao tragičnu posljedicu dugogodišnjeg ignoriranja i distanciranja kantonalnih, entitetskih, i državnih političara koji su prestali da suosjećaju sa običnim građanima od kojih veliki broj živi ispod granice siromaštva bez perspektive za bolje sutra. Neprihvatljivo je da Ministarstvo sigurnosti Bosne i Hercegovine nije zaštitilo državne objekte kao što je Predsjedništvo Bosne i Hercegovine koje ostaje simbol otpora grada Sarajeva i Republike Bosne i Hercegovine za vrijeme agresije na našu domovinu.



INSTITUTE FOR THE RESEARCH OF GENOCIDE
CANADA

Upozoravamo sve građane Bosne i Hercegovine da ne nasjedaju na manipulacije ovih protesta u političke svrhe od strane oportunističkih, profitera i neprijatelja Bosne i Hercegovine koji žele da ovi protesti eskaliraju u etničke podjele ili u kolaps države Bosne i Hercegovine. Najoštrije osuđujemo izjave Milorada Dodika, te pozive iz Beograda čelnicima iz manjeg entiteta, a zatim kontroverznu posjetu premijera Hrvatske kojom su pokazali neodgovornost i nepoštovanje suvereniteta, teritorijalnog integriteta, nezavisnosti i jedinstva države Bosne i Hercegovine. Ovakvo ponašanje, odnosno direktno miješanje u politiku Bosne i Hercegovine podsjeća na politiku iz 1992. godine koji je doveo do agresije na Bosnu i Hercegovinu od strane Srbije, Crne Gore, a zatim i Hrvatske.

Bošnjaci Sjeverne Amerike, kao državljani Bosne i Hercegovine i žrtve genocida, solidarišu se sa svim građanima Bosne i Hercegovine koji je smatraju svojom jedinom domovinom. KBSA i IGK će svakodnevno apelovati na State Department Sjedinjenih Američkih Država i Kanadsku vladu za jači angažman ovih država prema Bosni i Hercegovini. Neprihvatljivo je da Sjedinjene Američke Države, kao posrednici i garantori Dejtonskog mirovnog sporazuma, i Kanada mirno gledaju dok se ista demokratska prava osporavaju državi Bosni i Hercegovini i njezinim građanima koji već godinama čekaju na promjene i žele da zauzmu svoje mjesto u Europi s ponosom i dostojanstvom koji zaslužuju.

Kongres Bošnjaka Sjeverne Amerike

Institut za istraživanje genocida, Kanada